

30 APR 2001

Mahathir-Pekerja

DR MAHATHIR MAHU K'JAAN DAN PEKERJA TANGKIS BAHAYA GLOBALISASI

KUALA LUMPUR, 30 April (Bernama) -- Datuk Seri Dr Mahathir Mohamad berkata kerajaan dan pekerja harus berganding bahu dan menyusun langkah bersama untuk membuatkan pertahanan mereka menjadi lebih berkesan dalam menangkis bahaya yang datang melalui globalisasi.

Sambil memberi jaminan bahawa kerajaan akan terus membela nasib pekerja, Perdana Menteri mengajak mereka semasa merayakan Hari Pekerja esok, supaya memperingatkan diri mereka akan bahaya yang bakal dihadapi melalui globalisasi.

"Jika kerajaan sekarang tidak begitu senang hati dengan globalisasi dan ingin mengadakan syarat-syarat tertentu, sebabnya ialah kerana kita tidak yakin dengan keikhlasan mereka yang mencipta globalisasi dan cuba memaksa penerimaannya secepat mungkin.

"Kita telah melihat bagaimana kebebasan yang diberi untuk menjual-beli matawang telah menyebabkan jutaan pekerja kehilangan pekerjaan dan menjadi miskin semula. Perniagaan matawang adalah sebahagian daripada proses globalisasi," kata beliau dalam perutusannya sempena Hari Pekerja esok.

Oleh itu apakah tidak mungkin globalisasi seperti yang dilaksanakan sekarang tidak akan membawa kesan yang sama atau lebih buruk kepada negara dan kepada pekerja khususnya.

Menceritakan mengenai bahaya globalisasi, Perdana Menteri berkata pada satu masa dahulu pemodal atau kapitalis telah menindas pekerja mereka dan untuk mendapat keadilan, masyarakat pekerja menubuhkan kesatuan sekerja serta parti buruh dan melaluinya penindasan dapat dikurangkan.

"Malangnya kekuatan kesatuan dan parti buruh menyebabkan mereka membuat tuntutan-tuntutan yang keterlaluan. Kerajaan-kerajaan yang didirikan oleh parti buruh atau sosialis telah memiliknegerakan semua perusahaan dengan kepercayaan bahawa segala keuntungan yang didapati, akan dapat diagihkan kepada pekerja dengan lebih saksama," katanya.

Malangnya, ini menyebabkan produktiviti menurun dan kos pengeluaran meningkat dengan tinggi. Hasil keluaran menjadi tidak berdaya saing dan keuntungan tidak diperolehi dan akhirnya ekonomi negara merosot dengan teruknya.

Dr Mahathir berkata kepercayaan kepada kerajaan sosialis atau buruh merosot disebabkan ini, dan pekerja sendiri menolak parti mereka serta memilih parti yang lebih memihak kepada majikan dan kapitalis.

Oleh kerana kerajaan-kerajaan kapitalis tidak lagi begitu menekan pekerja untuk mendapat sokongan, parti-parti buruh terpaksa menghargai peranan pelabur kapitalis, katanya.

"Dengan itu kita lihat sekarang parti buruh tidak banyak berbeza daripada parti yang disokong oleh kapitalis. Mereka juga menerima penswastan sebagai pendekatan yang baik untuk menjaga kepentingan pekerja. Demikian kita melihat perbezaan antara peranan pekerja dengan majikan tidak sebegitu ketara lagi.

"Masyarakat terpaksa mengakui akan peranan kedua-dua pihak, pelabur dan kapitalis di satu pihak dengan pekerja di pihak lain, adalah sama penting," kata Perdana Menteri.

Bagaimanapun Dr Mahathir berkata proses menentukan peranan siapa yang lebih penting dan perlu dihargai, belum tamat.

Semasa Perang Dingin, persaingan ialah antara negara sosialis dan komunis yang kononnya memihak kepada pekerja atau buruh dengan puak pasaran bebas mengutamakan kepentingan pelabur atau kapitalis.

Beliau berkata persaingan itu berakhir apabila blok sosialis ditewaskan oleh blok kapitalis pasaran bebas dan kekalahan blok sosialis yang total membuatkan puak kapitalis tidak ada lagi pencabar.

"Dengan itu mereka tidak lagi menerima keperluan mengawal nafsu tamak mereka. Niat mereka yang lama untuk menguasai dan mengeksploitasi seluruh dunia sudah kembali.

"Mereka mencipta pelbagai pendekatan untuk menjayakan matlamat mereka. Antaranya ialah globalisasi atau dunia tanpa sempadan dengan wang yang bertimbun-timbun yang ada pada mereka boleh melintasi semua sempadan untuk menguasai segala-galanya," kata Dr Mahathir.

Dalam perancangan mereka, pekerja tidak ada peranan selain daripada menyumbang kepada keuntungan besar dan jika upahan pekerja di satu negara tinggi sedikit, mereka akan mencabut perusahaan dan perniagaan mereka untuk pergi ke negara yang menawarkan upah lebih murah.

Dr Mahathir menegaskan bahawa kesan daripada tindakan ini tidak terhad kepada pekerja sahaja, tetapi juga kepada negara.

"Akhirnya mereka yang sudah kaya, kapitalis jenis baru ini, akan lebih kaya dan yang miskin akan lebih miskin. Keadaannya tidaklah banyak berbeza daripada pengguguran pekerja tempatan kerana ingin menggantikannya dengan pekerja asing yang sanggup menerima upahan lebih rendah.

"Kemungkinan-kemungkinan ini hendaklah diberi perhatian oleh masyarakat pekerja di zaman globalisasi ini," katanya.

Perdana Menteri berkata warga pekerja di negara ini sungguh bertuah kerana sekali lagi dapat menyambut Hari Pekerja dalam keadaan terselamat daripada ancaman pengangguran secara besar-besaran.

Kerajaan pula, katanya, terus menghargai dan mengiktiraf sumbangan dan jasa mereka kepada kemajuan negara.

Dr Mahathir berkata pekerja adalah nadi penting kepada pembangunan dan kemajuan rakyat serta negara dan kerajaan berharap para pekerja akan sentiasa bertindak berhati-hati supaya kestabilan dan daya penarik negara sebagai loksai pelaburan, akan berterusan.

"Sementara kita tidak menafikan peranan majikan tetapi majikan dengan sendirinya tidak mungkin menjayakan apa-apa usaha. Tetapi di masa yang sama kita juga perlu mengakui bahawa tanpa pelabur dan majikan, tidak akan ada peluang pekerjaan dan tidak akan ada pekerja," kata Dr Mahathir.

Mengenai tema Hari Pekerja tahun ini - "K-Pekerja Pemangkin Kecemerlangan Negara", Perdana Menteri berkata ia dipilih kerana pekerja zaman ini memerlukan pengetahuan yang lebih untuk meningkatkan produktiviti mereka dan menjadikan hasil kerja mereka lebih kompetitif.

"Sudah tentu ini bermakna pekerja mestilah sanggup dilatih semula. Adalah diharap kecekapan yang baru akan menolong meningkatkan pendapatan pekerja," kata beliau.

Dr Mahathir menegaskan sekali lagi bahawa kemajuan yang dicapai oleh negara sejak merdeka adalah hasil daripada keamanan yang wujud selama ini, serta sokongan dan sumbangan semua pihak kepada usaha dan dasar kerajaan.

"Justeru itu, adalah wajar kita semua bersyukur dengan nikmat yang kita perolehi selama ini. Kita harus insaf hidup kita selama ini begitu selesa, bahagia, aman dan makmur," katanya.

Beliau mengucapkan terima kasih kepada semua warga pekerja yang telah tekun bekerja untuk membina negara ini ke arah kecemerlangan.

-- BERNAMA

ES ES RON